

Tahanan diberi layanan baik - Ahmad Awang

ALOR STAR, Jumaat — Langkah Kerajaan dibawah pimpinan Perdana Menteri, Datuk Seri Dr. Mahathir Mohamad membebaskan seramai 21 orang tahanan ISA semalam adalah satu keputusan rasional.

Haji Ahmad bin Awang, bekas Ketua Dewan Pemuda PAS Kedah, salah seorang yang dibebaskan berkata langkah tersebut patut di sanjung tinggi khususnya dari keluarga yang dibebaskan.

"Saya tidak lupa mengucapkan terima kasih kepada Menteri Dalam Negeri, Datuk Musa Hitam yang membebaskan saya dari kem tahanan Kemunting", katanya.

Beliau juga bekas Ahli Dewan Undangan Negeri Kawasan Pengkalan Kundur mengucapkan terima kasih kepada semua pegawai kem tahanan yang telah memberikan layanan baik sepanjang masa hingga waktu dibebaskan.

"Saya menjalani tahanan di kem tersebut selama 13 bulan dan 15 hari dengan mendapat layanan yang memuaskan." tam-

bahnya.

Beliau disediakan kemudahan mengerjakan ibadat seperti menunaikan sembahyang waktu dan Jumaat serta kemudahan sukan.

"Semasa dalam tahanan saya dapat juga mempelajari Bahasa Inggeris dan menambahkan lagi pengetahuan agama Islam dari rakan-rakan dalam tahanan itu," jelasnya.

Haji Ahmad yang ditahan pada 16 Jun tahun lalu berkata dia mendapat tahu pada jam 8.15 pagi dari Pengusaha Kem Tahanan itu, Encik Kamaruddin, seramai 21 orang tahanan termasuk beliau sendiri dibebaskan.

Tidak seorang pun tahu, katanya, terdahulu dari itu mereka akan dibebaskan dari kem tahanan itu semalam.

"Saya bertolak dari kem dengan sebuah teksi pada jam 12 tengahari sampai kerumah jam 6 petang dan sempat berbuka puasa dengan keluarga dan bapa mertua dan ibu mertua," katanya.